

Dess wär was!

Om letzte Dinsdaachowend hott mich de Schorsch oogerufe: Honnes, hotter gesaacht, Honnes, hosde aach Fussball geguckt? Unn hosde aach gesehe, wie unser Buwe Schwarz geschafft hawwe? 2-0 hawwe se Kamerun gebutzt, jetz wern merr Weltmeister!

Unn noochdem die deutsch Monnschaft aach om Somsdaachmoie 1-0 gewunne hott, gibt's schunn Leit, die hawwe im Spillplon, den se jetz noch e onnerthalb Woch im Säckel sticke hawwe, bis zum Endspill immer Deutschland vorne hie geschriwwe. Unn weil die Amis ferrs nechste Spill als Geechner schunn feststehe, fehle joo nor noch zwaa.

De Karl moont halt immer, vom Fussball hätt ich koo Ohnung, ich det immer „Hond!“ kresche, wenn de Doormonn en Ball fängt. Debei guck ich merr grad die Doormänner gern oo. Besonnern unsern Kahn! Koo Wunner, dass der so wenich Doorn kassiert: Wer getraut sich dann bei dem e Door ze mache, so wie der soin Mund uffreißt? Doo bleibt merr als Geechespiller liewer e bisje weit weg. Unn mett em Fernschuss iss der Kahn nit leicht ze bezwinge. Hechstens von em Linksauße, weil die unn die Doormänner, die hawwe schunn immer en mords Schuss gehabt, dess waaß ich von em ahle Kumpel von mir.

Aach die Zuschauer guck ich merr gern oo. Unn deshalb vermiss ich om meisde die Saudis. Weil der Prinz von dene uff de Tribün, der hatt e Fraa newer sich, die hott so e Duch vorm Gesicht gehabt unn von der hosde nor die Aache geseh, awwer was ferr Aache! Unn die guckt jetzt nit mehr mich, sonnern ihrn Scheich oo.

Doo gucksde hie, hott die Karl gesaacht, awwer wer de Klose iss, dess waaßde nit.

Doch, habb ich gesaacht, dess iss doch der mettem Salto.

Unn wievill Doorn hott der geschosse?

Dess waaß ich nit, awwer vier Saltos hott er gemacht.

Doo war de Karl zefridde unn saacht: Dess wär was, wenn mir Weltmeister wernn dete. Weil mir allminonner brauche e Erfolgserlebnis. Es iss joo weit unn breit koon Spaß ze sehe, im Geechedeil: Doo hawwe merr de Teuro, die Londebohn, die Arweitslose unn die Ökosteier uff Mallorca, lauter Sache, doo kennsde dich de gonze Daach nor uffreeche. Unn deshalb wär en deutsche Weltmeister gut, dann kennte merr uns widder emol uff die Schulter kloppe, weil merr halt doch die Beste sinn.

Ich habb genickt: Unn wenn merr verliern, hawwe merr bestimmt e gud Ausredd!

Eiern Honnes

